

# NEWSLETTER



FONDACIJA  
HASTOR

juni 2022.

# Predstavljanje NOVIH STIPENDISTA

S ponosom možemo kazati da je od ove godine Fondacija Hastor bogatija za čak 42 novih studenata stipendista koji će svojom ambicioznoću nesumnjivo u mnogome doprinijeti ostvarenju njenih ciljeva. Ovoga mjeseca s iznimnim zadovoljstvom predstavljamo drugu grupu naših novih stipendista te im pritom još jednom želimo dobrodošlicu među članove Fondacije Hastor.



## AMINA NUHIĆ

Nova stipendistica je Amina Nuhić, ima 22 godine i dolazi iz Živinica. Amina je studentica treće godine na Medicinskom fakultetu u Tuzli, Odsjek zdravstvenih studija – studij medicinsko laboratorijske dijagnostike.



U Fondaciji Hastor sam pronašla nove prijatelje i stekla nova poznanstva. Fondacija Hastor nam, osim materijalne pomoći, pomaže i da se profiliramo na mnoga polja kroz razne edukacije i unapređujemo svoje znanje i vještine. Iako sam tek od nedavno stipendista, zahvalna sam na svemu što je Fondacija učinila za mene.

Proglašena je živiničkim šampionom znanja, a dobitnica je i priznanja Heroj generacije Tuzlanskog kantona. Već duži niz godina je volonterka „Crvenog križa“, gdje je prošla kroz razne edukacije te stekla zvanje šminkera povreda, stanja i oboljenja. Nedavno je proglašena za najboljeg šminkera na području Federacije BiH. Osim navedenog, članica je i Kulturno umjetničkog društva Živinice te „CasCader“ produkcije, koja se bavi snimanjem i realizacijom kratkometražnih filmova. Vrijedi istaknuti i to da je Amina nedavno postala i član Gradskog pozorišta u Živinicama.



## IZUDIN BEGOVIĆ

Izudin Beganović dolazi iz Tuzle i studira na Medicinskom fakultetu Univerziteta u Sarajevu, a trenutno pohađa petu godinu studija.



Zahvaljujući ovoj stipendiji imam mogućnost da radim ono što najviše volim, a to je da pomažem osobama u svojoj okolini što način rada Fondacije Hastor uveliko potencira. Upoznavši se s osnovnim ciljevima Fondacije Hastor, znao sam da je to mjesto i okruženje u kojem želim djelovati i razvijati vlastite sposobnosti.



U slobodno vrijeme voli učiti jezike i baviti se planinarenjem. Izudin ističe da voli putovanja te da putuje kad god za to nađe vremena.

# Predstavljanje NOVIH STIPENDISTA



## HADŽERA SELIMOVIĆ

Stipendistica Hadžera Selimović dolazi iz Sarajeva i studira internacionalne odnose na Univerzitetu Sarajevo School of Science and Technology. Studentica je druge godine.

**“**Čast mi je što sam postala stipendistica Fondacije Hastor i što dijelim vrijednosti kao što su humanost i posvećenost zajednici u kojoj živim. Očekujem da će u okvirima Fondacije Hastor rasti na ličnom i profesionalnom nivou te da će unaprijediti svoju zajednicu koliko god to bude bilo u mojoj moći.

Kao omladinska aktivistkinja volontira od svoje dvanaeste godine. Imala je priliku biti dio brojnih projekata u mnogim organizacijama u BiH. Pored formalnog obrazovanja na fakultetu, trenutno je i mlada evropska ambasadorica za Bosnu i Hercegovinu u EU te je, u skladu s ovim zvanjem, postala glas mlađih u zajednici EU. Pored toga organizatorica je TEDxYouth globalne konferencije, članica BOLD mreže mlađih lidera Američke ambasade u Sarajevu i „Chatham House Common Futures Conversations“ organizacije u Engleskoj. Trenutno stažira u Pragu u akademskom istraživačkom časopisu za sigurnosne studije u Evropi.



## MIRZET ŠKRGIĆ

Mirzet Škrgić ima 23 godine, dolazi iz Bihaća i student je četvrte godine Medicinskog fakulteta Univerziteta u Sarajevu.

**Princip rada Fondacije me je oduševio iz razloga što mi pored finansijske pomoći pruža priliku da unaprijedim svoja znanja i iskustva te da ista podijelim i s mlađim stipendistima. Za stipendiju sam saznao preko svojih prijatelja, također stipendista, i kad su mi prvi put objasnili na koji način djeluje Fondacija Hastor, bio sam oduševljen.**



U budućnosti želi postati hirurg kako bi mogao pomagati ljudima i spašavati mnoge živote. U slobodno vrijeme voli gledati filmove u kinu, a igra i stoni tenis. Najdraži hobи mu je, kako kaže, kuhanje.

# Predstavljanje NOVIH STIPENDISTA



## TIJANA SADIKOVIĆ

Tijana Sadiković je nova stipendistica koja dolazi iz Tuzle. Studentica je treće godine općeg studija Medicinskog fakulteta Univerziteta u Tuzli.



Fondacija Hastor mi daje motivaciju da se nastavim aktivno baviti volontiranjem i neformalnim obrazovanjem te da za takvo djelovanje uvijek pronađem vremena u svom rasporedu. Ona mi je pokazala da će se trud i zalaganje uvijek cijeniti, a najviše me inspirišu njene vrijednosti kojima podstiče na ulaganje u budućnost i njegovanje prosperiteta mladih u Bosni i Hercegovini.

U slobodno vrijeme uključena je u volontiranje kojim se počela baviti još na kraju osnovne škole kroz organizaciju „Crveni križ“ čiji je aktivan član i danas. Nerijetko svoju pomoć ukazuje i starijim ljudima u njenoj lokalnoj zajednici, pa nije ni čudo što je pronašla svoje mjesto u Fondaciji. Voli provoditi vrijeme u prirodi u krugu najbližih osoba, ali i razvijati nove vještine kroz razne aktivnosti, a neki od njenih najdražih hobija su šivenje i ples.

## IVONA KENJIĆ

Ivana Kenjić studentica je treće godine Prirodno-matematičkog fakulteta Univerziteta u Sarajevu, Odsjek za biologiju, smjer genetika. Ovaj smjer izabrala je jer smatra da je genetika nauka u usponu te nudi velike mogućnosti za istraživanje i napredovanje.

Nakon što sam o Fondaciji Hastor čitala na društvenim mrežama, čula sam i pozitivno iskustvo prijateljice koja je bivša stipendistica te sam odlučila aplicirati za stipendiju. Najviše mi se sviđa mogućnost rada i razmjenjivanja iskustava s drugim stipendistima. Smatram da na ovaj način imam šansu da unapređujem svoje vještine, radim na sebi, ali i na afirmaciji drugih mladih ljudi, stoga mi je zadovoljstvo što sam dio ove porodice.



Slobodno vrijeme ispunjava čitanjem knjiga i treningom. Ivona voli putovanja, stoga nerijetko upoznaje druge kulture i države. Istaže kako je za Fondaciju saznala putem društvenih mreža i da je još pri prvom susretu s njenom misijom i idejom znala da je to okruženje u kojem želi pronaći mjesto za sebe.

# Predstavljanje NOVIH STIPENDISTA



## JASMINA HALILOVIĆ

Iz Konjica nam dolazi Jasmina Halilović. Studentica je pete godine Medicinskog fakulteta Univerziteta u Sarajevu.

**“** O Fondaciji Hastor i detaljima njenog rada saznaš sam preko bliske prijateljice i putem društvenih mreža. Smatram da misija i ideja Fondacije omogućavaju svakoj mladoj osobi da postane još bolji i ambiciozniji član društva i lokalne zajednice, naročito kroz programe volontiranje te sam upravo zbog toga iznimno sretna i ponosna što sam postala član velike Hastor porodice.

Za sebe kaže da voli pomagati ljudima te je upravo iz tog razloga i izabrala ovo zanimanje i aplicirala za stipendiju Fondacije Hastor. Jasmina je članica Udruženja studenata medicine BoHeMSa. Svoje slobodno vrijeme provodi u druženju s porodicom, prijateljima i svojim ljubimcima, a posebno ističe ljubav prema čitanju knjiga te crtanju.



## AMINA DŽINALIĆ

Studentica druge godine Pravnog fakulteta u Sarajevu Amina Džinalić dolazi iz Visokog.



Za Fondaciju sam čula preko društvenih mreža, ali i na fakultetu s obzirom na to da mi je asistentica Lejla Ramić, inače bivša stipendistica Fondacije Hastor, predavala na prvoj godini studija. Ono što me najviše privuklo jeste segment volontiranja s obzirom na to da je to nešto što mi nije strano i što sam radila i ranije. Činjenica da mogu nekome pomoći na bilo koji način me istinski ispunjava i čini sretnom, a Fondacija mi je omogućila da to i dalje radim.



Amina ističe da već 15 godina svira violinu za koju voli reći da je njena prva ljubav. Skoro tri godine nastupa s grupom „Rejjan“ te održava muzičke radionice za djecu. U budućnosti želi postati dobra advokatica, a svoje znanje bi voljela, kako ističe, dijeliti i sa studentima, prenoseći im znanje iz oblasti prava kao što je sada slučaj s muzikom i znanjem iz te oblasti.

# Predstavljanje NOVIH STIPENDISTA



## SALEHA REDŽEPI

Saleha Redžepi dolazi iz Sarajeva i studentica je integriranog studija na Medicinskom fakultetu Univerziteta u Sarajevu. Uspješno je završila petu godinu studija.



U Fondaciji pronalazim priliku da ostvarim svoj potencijal kroz zajedništvo, pristupačnost, ljudskost te kroz evaluaciju rada.

Naravno, o finansijskoj pomoći ne moram ni govoriti, to je svakako itekako bitno, dovoljan je osjećaj da možete otići na bilo koji kongres za koji smatrate da će vam pomoći u budućem radu, a da znate da time niste opteretili svoje roditelje.

Svoje vrijeme provodi volontirajući u zdravstvu, gdje ima priliku usvajati nova saznanja na polju medicine kako unutar granica naše domovine tako i u inostranstvu preko studentskih razmjena. Također, Saleha volontira u „Crvenom križu“ i Fondaciji Hastor, gdje kroz edukacije i mentorstvo stiče nova prijateljstva i iskustva te razvija svoje socijalne vještine. U slobodno vrijeme bavi se slikarstvom.



## AMILA TURSUNOVIĆ

Amila Tursunović, studentica treće godine općeg studija medicine na Medicinskom fakultetu u Tuzli, dolazi iz Živinica.



Fondaciju Hastor vidim kao veliku zajednicu, podršku, priliku za rast i lični razvoj. Ponosna sam što sam postala dio ove pozitivne priče u kojoj mogu sticati nova znanja, iskustva, ali i podijeliti svoje skromno znanje s drugima, a sve u cilju zajedničkog napretka. Radujem se svakom novom sastanku sa svojom volonterskom grupom, druženju te razmjeni iskustava i mišljenja.



Već deset godina bavi se društvenim aktivizmom kroz nevladin sektor, a nadamo se da će sav svoj potencijal iskoristiti i kroz angažman u Fondaciji. Imala je priliku raditi na mnogim projektima, a pohađa i brojne edukacije i seminare. Među njima ističe program „Osnaženi mladi za održivu budućnost“ te „Trauma-orientirani mirovni rad u BiH“ koji trenutno pohađa. Predstavljala je Bosnu i Hercegovinu na Ljetnoj akademiji za interkulturni dijalog u Njemačkoj. U slobodno vrijeme volontira i pomaže drugima, a tome u prilog ide i poziv koji je odabrala. Od hobija najviše voli slikanje te crtanje portreta. „Budi promjena koju želiš vidjeti u svijetu“, čuvena izreka Mahatme Gandhija, njen je glavni moto.

# Predstavljanje NOVIH STIPENDISTA



## AJLA ARNAUT

Iz Zenice nam dolazi Ajla Arnaut. Ajla je studentica treće godine Pravnog fakulteta Univerziteta u Zenici.

**“**Čast mi je biti dio Fondacije Hastor s obzirom na to da se radi o Fondaciji koja pruža osjećaj sigurnosti, samopouzdanja i pruža podršku mladim ljudima, kako u obrazovanju tako i u životu, te ih podstiče da prvenstveno budu dobri ljudi koji će svoje znanje iskoristiti na način da doprinesu društvu u kojem živimo. Aplicirala sam za stipendiju najviše iz razloga što je Fondacija Hastor jedna od rijetkih organizacija koja potencira volonterski rad i trud.

Za vrijeme druge godine studija imala je priliku učestvovati na regionalnom takmičenju „Moot court“ (simulacija sudenja) u okviru nastavnog predmeta Ljudska prava i osnovne ljudske slobode. Takmičenje se održalo u Srbiji u Nišu te je osvojila prvo mjesto i predstavila svoj fakultet u najboljem svjetlu. Učestvovala je i u projektu „Ljeto u biblioteci“ koji se organizovao 2019. godine u Zenici, gdje je imala priliku da volontira s djecom koja pohađaju osnovnu školu. Nadalje, bila je član Saveza izviđača, a bavi se šminkanjem od svoje osamnaeste godine u čemu dosta uživa i to smatra svojim hobijem.



## IRMA DŽIHAN

Nova stipendistica je i Irma Džihan koja dolazi iz Sarajeva. Studentica je druge godine na Univerzitetu Sarajevo School of Science and Technology na Odsjeku za političke nauke i međunarodne odnose.



Za Fondaciju Hastor sam saznala preko prijatelja koji su već stipendisti. Vještine i znanje koje možemo dobiti kroz volontiranje smatram veoma bitnim. Mislim da je to jedna od vrlina koje nudi ovakav program stipendiranja, na taj način, prije svega, dobijamo priliku da upoznamo druge ljudе, ali i da steknemo iskustvo koje nam poslije može biti od koristi.



Od srednje škole, pored nastavnih aktivnosti, bavi se i aktivizmom kroz učešće na radionicama i konferencijama koje su se bavile temama migracija, ljudskih prava, rodno zasnovanog nasilja i slično. Uvezši u obzir da je istraživanje veliki dio njene profesije, trenutno obavlja praksu na Metropolitan Univerzitetu u Pragu na mjestu asistenta istraživačkog instituta.

# Predstavljanje NOVIH STIPENDISTA



## ADNA ZIRIĆ

Adna Zirić studentica je druge godine Pravnog fakulteta Univerziteta u Bihaću.



Kada je u pitanju Fondacija, morala bih naglasiti da je to za mene jedno zaista veliko i korisno iskustvo. Baveći se volontiranjem, shvatila sam koliko svako od nas može napredovati samo ako to uistinu želi. Smatram da ovakav princip rada Fondacije može u nama probuditi veliku želju za napredovanjem, pomaganjem i djelovanjem u okviru lokalne zajednice, ali i šire.

Po završetku gimnazije odlučila se za studij prava jer smatra da nudi širok spektar zanimanja. Imala je priliku učestvovati na državnom takmičenju u simulaciji sudenja pred Evropskim sudom za ljudska prava, čiji je organizator Studentski zbor Pravnog fakulteta Sveučilišta u Mostaru, a u saradnji s Misijom OSCE-a za BiH i Visokim sudske i tužilačkim vijećem. Takmičenje joj je pružilo mogućnost da na praktičan način pokaže svoje afinitete prema onome čime se u budućnosti namjerava baviti.



## KEMAL DURIĆ

Iz Sarajeva dolazi Kemal Durić. Ima 21 godinu i student je druge godine Medicinskog fakulteta u Sarajevu.



Fondacija Hastor pruža značajan stimulans za perspektivne učenike i studente. Mentorstvo kao sjajna prilika za sticanje novih iskustava samo je jedan od razloga zašto sam se odlučio aplicirati za stipendiju Fondacije Hastor. Ovaj tim omogućava etabriranje pozitivnih socijalnih praksi za svakog člana pojedinačno. Nova znanja i steklena prijateljstva ostvarila su značajan impakt na moj lični, ali i profesionalni razvoj.



U slobodno vrijeme bavi se čitanjem knjiga, sportom, različitim formama neformalne edukacije te pohađanjem online kurseva.

# Predstavljanje

# NOVIH STIPENDISTA



## NEJRA HINDIJA

Studentica četvrte godine Medicinskog fakulteta Univerziteta u Sarajevu Nejra Hindija dolazi iz Visokog.

**“ Za Fondaciju sam saznala preko prijatelja koji je bio stipendista, a sad je veoma uspješan u svom poslu. Saznanje da mi Fondacija može pružiti veliku podršku i pomoći u školovanju, a kasnije i u poslu, uveliko motivira na ostvarenje dječjeg sna. Još uvijek se upoznajem s pravilima i mogućnostima, ali mogu reći da je velika čast biti dio ovakvog projekta, druženja i učenja.**

Članica je Udruženja studenata medicine u Bosni i Hercegovini BoHeMSA. Od drugog razreda osnovne škole trenirala je karate, a uskoro nakon kratke pauze planira nastaviti kada s radom kreće klub koji je osnovala s prijateljima. Osim toga, rado vozi bicikl i trči.



## NADINA KOLIĆ

Nadina Kolić dolazi iz Zenice, ima 20 godina i studentica je druge godine Politehničkog fakulteta Univerziteta u Zenici, Odjel za softversko inženjerstvo.



**Fondaciju Hastor prije svega vidim kao jednu veliku porodicu koja nas uvijek podsjeća da je tu za nas u svakom momentu. Smatram da sam dobila veliku priliku da napravim znantne promjene kako za svoju okolinu tako i za sebe. Želim da se izgradim kao potpuna ličnost i to bi bila najveća promjena, a onda pomoći i svojoj zajednici i drugim mlađim ljudima da se ostvare.**



Slobodno vrijeme provodi čitajući knjige i boraveći u prirodi.

# Predstavljanje NOVIH STIPENDISTA



## DŽANA FEJZIĆ

Džana Fejzić dolazi iz Hadžića i studentica je treće godine Stomatološkog fakulteta sa klinikama Univerziteta u Sarajevu.

**“** Fondacija Hastor kroz sve segmente svog rada promovira obrazovanje i sticanje znanja kao jednu od najvažnijih stvari u životu. Uz učenje neodvojivo je pomaganje drugima i sticanje društvene odgovornosti. Kroz dosadašnje aktivnosti shvatila sam da je ovo jedna porodica u kojoj su interakcija i komunikacija ključ svih uspjeha.

Slobodno vrijeme koristi za druženje s porodicom, prijateljima i čitanje knjiga. Ističe da joj je najdraža aktivnost volontiranje u predškolskoj ustanovi koju pohađaju autistična djeca.



## NEJLA PLJAKIĆ

Nejla Pljakić dolazi iz Sarajeva i ima 21 godinu. Studentica je druge godine Farmaceutskog fakulteta Univerziteta Sarajevo School of Science and Technology.

Vizija i filantropija Fondacije Hastor predstavljaju pravi način razvijanja i unaprijedivanja omladine Bosne i Hercegovine. Najbitnija prilika koju sam dobila jeste prilika razvijanja i vlastitog unapređenja, a ne sumnjam da ću tu priliku znati iskoristiti na najbolji mogući način.



Od svojih hobija izdvaja „PharmBabes“ – profil edukativnog sadržaja koji vodi s drugaricom od maja 2021. godine. Cilj je bio kreirati stranicu kojom će edukovati vršnjake o zdravstvenim temama o kojima bismo svi trebali imati znanje. Veliku pažnju pridaje i projektu „PharmaSkin“ u kojem se upustila u vode kozmetike praveći mala labela i kreme za liječenje akni.

# Predstavljanje

# NOVIH STIPENDISTA




## SARA-FARAH MATERNE

Sara-Farah Materne studentica je na Prirodno-matematičkom fakultetu Univerziteta u Sarajevu na Odsjeku za matematiku, smjer Teorijska kompjuterska nauka. Trenutno je studentica prve godine master studija.

**“** O Fondaciji sam, prije nego što sam postala stipendistica, imala priliku čitati, ali i čuti pozitivna iskustva onih koji su ranije postali njeni članovi. Sada, Fondacija za mene predstavlja prije svega podršku, priliku za nova poznanstva, ali i mogućnosti za napredak i rad na sebi kroz raznovrsne volonterske aktivnosti. Misiju Fondacije smatram veoma plemenitom s obzirom na to da ona podrazumijeva velikodušno ulaganje u buduće stručne kadrove svih profila i usmjerenja, raznih uzrasta i iz različitih sredina.

Većinu svog vremena posvećuje fakultetskim obavezama. Slobodne momente koristi da se bavi muzikom, druži s prijateljima ili igra igrice.



# Stipendista MJESECA

Fondacija Hastor može se pohvaliti marljivim, ambicioznim i uspješnim stipendistima koji ostvaruju zapažene rezultate na polju obrazovanja i nauke. Dakle, tim Fondacije čine mlađi ljudi koji doprinose njenom radu, unapređujući ga svojim znanjem i vještinama. Upravo takve vrijednosti i predanost volonterskom angažmanu u okviru Fondacije Hastor iz mjeseca u mjesec stipendistima donose titulu Stipendiste mjeseca. U nastavku čitajte o stipendisti koji je tu titulu odnio ovaj mjesec!

## AMIR HADŽIABDIĆ



Da uz svaki trud uporedno hodi i nagrada svjedoči činjenica da Fondacija Hastor svakog mjeseca izabere stipendistu koji se pokazao kao najuspješniji u proteklih mjeseci dana, a kruna njegovog dostignuća je titula Stipendiste mjeseca. Svaki mjesec izabrani nosilac ove titule nosi novu inspirativnu priču s putovanja stazama svog uspjeha, a ovoga puta tu priču nosi Amir Hadžiabdić.

Dvadesetogodišnji Amir Hadžiabdić iz Vogošće ovog mjeseca je zavrijedio titulu Stipendista mjeseca. Nakon završetka Srednje medicinske škole "Jezero" svoj obrazovni put nastavlja srodnom stazom upisujući Medicinski fakultet u Sarajevu.

Amirov volonterski rad počeo je tokom srednjoškolskog obrazovanja kada je, pored mjesечnog volontiranja u Fondaciji Hastor, volontirao i u svojoj lokalnoj zajednici. Pored navedenog, trenirao je i košarku u KK „Koš“. S istim klubom zaigrao je za A2 ligu i to kao kapiten kluba. Na putovanjima s klubom imao je priliku steći prijatelje različitih usmjerenja pa ističe kako je to važno iskustvo u životu mladog čovjeka. Ovo ga je motivisalo da svoja iskustva dijeli s ljudima s kojima se susretao u toku volonterskih aktivnosti jer smatra da je važno da ono što on nauči na putovanjima ili na bilo koji drugi način vrijeđi podijeliti s drugima, a pogotovo s mlađim stipendistima koji u njemu vide uzor i podršku.

U toku studija odlučio je da svoje volonterske aktivnosti podigne na jedan novi nivo. Počeo je s recikliranjem otpada koje se nakuplja na izletištima, a uz to je odlučio svoje znanje i vještine podijeliti s poznanicima dajući im instrukcije iz pojedinih predmeta. Treniranje košarke još je neko vrijeme ostalo njegov hobi. S klubom KK „Vogošća“ po prvi put je debitirao u A1 ligi i uspješno završio sezonu do kraja. Nažalost, zbog obaveza koje studiranje sa sobom nosi, odlučio je prestati s treniranjem košarke. Uprkos svemu tome, sportski duh nije u potpunosti nestao iz Amirovog života. Još uvijek povremeno sudi na košarkaškim utakmicama, a sportski način života je našem stipendistu pomogao u razvoju radnih navika koje mu pomažu da bolje organizuje ispunjavanje životnih ciljeva.

# Stipendista MJESECA

Njegovi planovi za budućnost su da poboljša svoju lokalnu zajednicu i da na tom poboljšanju radi kao individua, koliko to bude moguće, te da kroz razgovor s prijateljima promoviše vrijednosti koje će biti korisne u društvu. U daljoj budućnosti planira završiti specijalizaciju za fizijatra. Ističe kako mu je u toku dosadašnjeg obrazovanja najdraže gradivo bilo iz domena koštano-mišićnog sistema i baš to je razlog njegovog ciljanog opredjeljenja. Iako ima mnoge planove, prije svega stavlja svoj prvi životni cilj, a to je pomaganje ljudima.

“ Glavnu ulogu u toku mog školovanja bez sumnje je zauzela Fondacija Hastor koja mi je pomogla da budem uspješan u srednjoj školi, a to čini i sada. Motivaciju za učešće u vannastavnim aktivnostima sam crpio iz uspješnih životnih priča stipendista i alumnista Fondacije Hastor. Za mene je svaki volonterski sastanak predstavljao pozitivnu priču iz koje mogu izvući upute za razvoj uspješne budućnosti. Ono što mi je danas, u ovim čudnim vremenima, najbitnije je činjenica da sam izrastao u dobrog čovjeka gledajući sve te vrijedne ruke koje čuvaju stubove Fondacije Hastor. Volontirajući, upoznao sam mnoge ljudе iz drugih gradova s kojima sam uvijek rado razmjenjivao iskustva. Stipendija Fondacije Hastor mi je bila veliki podsticaj za postizanje uspjeha i pomogla mi je da bar na neki način promijenim svoju okolinu u pozitivnom smislu.



Amirova poruka za sve trenutne i buduće stipendiste Fondacije Hastor je da nikada ne odustaju od svojih ciljeva i da kreiraju ideje koje će voditi ka boljoj budućnosti. Talent i genijalnost ne mogu zamijeniti upornost jer su upornost i odlučnost nezamjenjive osobine uspješnih jedinki.

# Rubrika aktivnih mladih - RAM

*Rubrika aktivnih mladih prostor je kroz koji svaki mjesec predstavljamo najvrednije stipendiste naše Fondacije. To su oni koji iz dana u dan nastoje svoje vrijeme i energiju uložiti u više ciljeve te na taj način poboljšati sebe, ali i svoje društvo. Onako kako je RAM (radna memorija) dio računara bez kojeg se njegov rad ne može ni zamisliti, tako su naši stipendisti, koji pored volonterskog aktivizma u sklopu Fondacije izuzetno marljivo rade i u svojim lokalnim zajednicama i time na najbolji mogući način predstavljaju Fondaciju Hastor i njenu misiju, dio bez kojeg naš rad zasigurno ne bi bio isti. RAM je rubrika posvećena onima koji svakodnevno aktivno rade na tome da poboljšaju svoje društvo i unaprijede sebe, stoga nam je zadovoljstvo svakog mjeseca govoriti o nekome od njih, a ovoga puta ta čast pripala je Amиру Baltiću.*



Amir nam prenosi kako se članstvo u Fondaciji i djelovanje u njenim okvirima reflektовало на njegovu buduću ljekarsku karijeru. Fondacija Hastor i samo volontiranje u istoj te ljekarski poziv imaju jednu vrlo bitnu sličnost – altruizam.

# Rubrika aktivnih mladih -

## RAM

---

**Volontiranje u lokalnoj zajednici pod motivom altruizma pomoći će drugim osobama ili okruženju, ali isto tako će ispuniti i nas same,** naglašava Amir.

---


Amir Baltić je stipendista Fondacije Hastor iz Sarajeva koji pohađa petu godinu Medicinskog fakulteta Univerziteta u Sarajevu. Iako je završio Srednju medicinsku školu Sarajevo, kaže da medicina nije bila njegova prva želja onda kada je odlučivao čemu želi da posveti svoje vrijeme u budućnosti. Amir je kao mali želio da svoju kreativnost ispolji kroz arhitekturu, ali medicina je prevagnula u njegovom odabiru zanimanja prvenstveno zbog toga što je predstavljala izazov i nešto što bi zadovoljilo njegovu altruističku prirodu. Imao je cilj da postane medicinski tehničar, ali je nakon ispunjenja tog sna odlučio postaviti sebi i cilj da postane ljekar i na dobrom je putu da to i ostvari te da na taj način pokaže kako se kroz konstantan napor i trud može ostvariti sve čemu težimo.

---

**Moja poruka za sve stipendiste Fondacije jeste da ne trebaju odustajati od svojih snova. Iako to zvuči kao floskula koju svako izgovara bez imalo značaja, na osnovu svog primjera mogu tvrditi da je uistinu tako. Ako nešto dovoljno želite i imate jasan cilj i razrađen plan kako do njega doći, ništa vas ne može zaustaviti u toj zamisli,** zaključuje Amir Baltić. zaključuje Amir.

---

Stipendista Fondacije Hastor je već drugu godinu, a nedavno je učestvovao na 43. Internationalnom medicinskom studentskom kongresu kao pasivni, ali sljedeće godine planira da se prijavi i kao aktivni učesnik. Internationalni medicinski studentski kongres se održavao od 20. do 25. maja u Sjevernoj Makedoniji u Ohridu, a organizovao ga je Macedonian Medical Student's Association (MMSA) uz podršku Medicinskog fakulteta u Skoplju.



Sami kongres je edukativnog karaktera, svaki student medicine pozvan je da dođe iz bilo koje države, a može učestvovati kao aktivni ili pasivni učesnik. U sklopu Kongresa su bila predavanja, izlaganja studenata, radionice kojima je svaki student mogao prisustvovati, a dnevno se održavalo par radionica pod određenim temama od kojih je svaki student mogao izabrati po jednu. Amir je prisustvovao na radionici pod nazivom „Be an attending Physician for the day“ u kojoj su bili slučajevi iz prakse te je sa svojom grupom osvojio zavidno prvo mjesto.

Istiće da sebe vidi kao vrlo otvorenu i komunikativnu osobu, a vodi se motom **„Najzanimljiviji ljudi su najzainteresovaniji ljudi“**. Smatra da je s godinama naučio kako se snalaziti u različitim situacijama, a pogotovo u onima gdje treba pažljivo i trezvено reagovati. Istiće da svojom posebnošću smatra i kreativnost te poznavanje zanimljivih činjenica. Od hobija izdvaja vožnju bicikлом, a voli da provodi vrijeme u društvu filozofskih knjiga velikih misilaca poput Friedricha Nietzschea, Arthura Schopenhauera, Markusa Aureliusa. Dodaje još i kako, kad god za to ima priliku, prati najnovija otkrića u svijetu medicine.



# Rubrika aktivnih mladih -

## RAM

---

**Savjetovao bih mlađe studente da što veći dio svog slobodnog vremena ulože u razvoj sebe kao ličnosti u svim pogledima, ne samo na fakultetu nego i u svim segmentima života, i da ne dopuste da ih samo profesija definije kao osobe,** kaže ovaj marljivi stipendista Fondacije Hastor.

---

Amir napominje da i studenti Medicinskog fakulteta Univerziteta u Sarajevu održavaju Internacionalni medicinski naučni kongres pod nazivom „SaMED“ koji se održava 7. godinu zaredom. Amir se nalazi u hosting timu te ove godine održava radionicu pod nazivom „Everything you need to know about surgical suturing“ koja ima za cilj da studente pretkliničkih godina medicinskog fakulteta nauči osnovama hirurškog šivenja i tako ih pripremi za predmet Hirurgija te za njihov budući posao ljekara.

Kao stipendista Fondacije Hastor u prvoj godini volontirao je u mentorskoj grupi sa stipendistima iz srednje škole. Tokom tog perioda upoznao se sa svim stipendistima svoje grupe i ostvarili su prijateljski odnos koji održavaju i sada iako im više nije mentor. Sada je mentor učenicima iz osnovne škole, a vještine poput aktivnog slušanja, empatije te prenošenja znanja drugima koje je stekao kao mentor će, naglašava, koristiti na Kongresu „SaMED“.

---

**Dobne dinamike su me natjerale da se drugačije postavim prema osnovcima i srednjoškolcima i to mi je pomočilo da na neki način i sebe razvijem kao mentora. Imati zadatak da nekome budem mentor za mene predstavlja veliku čast i ispunjenje pa se radujem svim novim iskustvima,** kaže Amir.

---

Iskustvo koje je stekao kao stipendista Fondacije Hastor mu je neprocjenjivo, ne samo za njegov budući ljekarski poziv nego i za život koji često umije da nas iznenadi svojom turbulentnošću.

---

**Fondacija Hastor za mene predstavlja tačku vodilju po kojoj mjerim svoja humana djela. Vodim se primjerom svih sadašnjih i bivših članova ove porodice i nastojim biti primjer budućim generacijama koje će doći poslije nas, saopćava nam ovaj stipendista,** kaže Amir.

---



# Alumni MJESECA

*Stipendisti Fondacije Hastor nastavljaju rado i aktivno doprinositi prvenstveno svojoj lokalnoj zajednici, ali i bosanskohercegovačkom društvu općenito i nakon završenog volonterskog perioda u Fondaciji. Njihov društveni aktivizam i napredak i onda kada ih na to ne obavezuje status stipendiste pokazateli su kako ljubav prema volontiranju i pomaganju drugima koju im je usadila Fondacija u njima ostaje zauvijek. Sve uspjehe sadašnjih i bivših stipendista Fondacija pomno prati i ponosna je na to što je u toku njihovog odrastanja utjecala na napredak i lični razvoj svakog od njih ponaosob. Tako je i s bivšom stipendisticom Irmom Marić, docenticom na Odsjeku za bosanski jezik i književnost na Fakultetu humanističkih nauka Univerziteta „Džemal Bijedić“ u Mostaru, čiju priču donosimo u nastavku.*

IRMA  
MARIĆ



**Iрма Marić je cjelokupno svoje školovanje uspješno završila u rodnom Mostaru.**

Nakon završenog pedagoškog smjera u Drugoj gimnaziji obrazovanje nastavlja na Odsjeku za bosanski jezik i književnost na Fakultetu humanističkih nauka Univerziteta „Džemal Bijedić“ u Mostaru. Studij je uspješno okončala 2009. godine, a u 2010. postaje asistentica na Nastavničkom fakultetu Univerziteta „Džemal Bijedić“ u Mostaru za užu naučnu oblast Bosanski jezik i književnost II. Svoju izuzetnu biografiju nastavlja upisom Interdisciplinarnog postdiplomskog studija na Kolegiju za književnost Fakulteta humanističkih nauka Univerziteta „Džemal Bijedić“ u Mostaru.

Položivši ispite, uspješno je odbranila magisterski rad 2013. godine i dobila zvanje magistrice humanističkih nauka iz područja književnosti. Iste godine stiče zvanje višeg asistenta za užu naučnu oblast Književnost na Odsjeku za bosanski jezik i književnost Fakulteta humanističkih nauka Univerziteta „Džemal Bijedić“ u Mostaru. Na istom fakultetu 2017. godine brani doktorsku disertaciju te postaje docent na Odsjeku za bosanski jezik i književnost. Od 2019. do 2021. godine obavljala je i dužnost prodekanica za nastavu na fakultetu.

Bila je dugogodišnji i izuzetno aktivan član Fondacije Hastor, gdje je s ostalim stipendistima i aktivistima učestvovala u više projekata, pa smo sretni da ju sada predstavljamo i kao uspješnu alumnisticu.

Jedan od značajnijih projekata u kojem sam učestvovala je „**Stiching Kinderhulp Bosnie**“ kroz koji se realizovala pomoć djeci Srebrenice, a nakon toga sam pomagala i radila na uvezivanju Fondacije s Hercegovinom pa su od tada djeca s ovih područja kontinuirano stipendirana.

# Alumni

## MJESECA

Irma dodaje kako je Fondacija Hastor bila, a i ostala, važan dio njenog odrastanja i školovanja. Od dana kada je postala stipendistica pa sve do završetka svoga školovanja vrijedno je radila nastojeći na pravi način pokazati koliko je zahvalna Fondaciji na podršci koju joj pruža, ali i želeći svojim primjerom pokazati društvu i okruženju koliko je Fondacija Hastor utjecala na njen odgoj i poimanje svijeta.

Naši bivši stipendisti svakodnevno pokazuju koliku želju za pozitivnim promjenama i inovacijama u društvu donose u bilo kojem profesionalnom okruženju. Tako je i Irma trenutno članica Upravnog odbora Bošnjačke zajednice kulture "Preporod" – Gradsко društvo Mostar, gdje provodi dodatne aktivnosti važne za afirmaciju bosanskog jezika, bošnjačke i bosanskohercegovačke književnosti i izvan granica Bosne i Hercegovine. U 2021. godini izašla je njena autorska knjiga Poetički modeli u romanima Irfana Horozovića (Gdje je Baluk Abad, a gdje Banja Luka?) u izdanju Univerziteta „Džemal Bijedić“ u Mostaru i Gradskog društva „Preporod“ Mostar te izdavačke kuće „Dobra knjiga“.

Učestvovala je na nekoliko konferencija i međunarodnih naučnih skupova u državi i inostranstvu, a radeve iz oblasti bošnjačke, bosanskohercegovačke i južnoslavenske književnosti objavljivala je u priznatim časopisima i zbornicima radova. Također, bila je urednik, recenzent i lektor nekoliko knjiga iz oblasti bošnjačke i bosanskohercegovačke književnosti, historije i kulture. Tokom višegodišnjeg akademskog obrazovanja i napredovanja bila je uključena u brojne manifestacije, tribine, predavanja, promocije novih izdanja širom Bosne i Hercegovine.

---

**Predmet mog naučnog rada i interesovanja je savremena bošnjačka i bosanskohercegovačka književnost, južnoslavenska književnost 20. vijeka, a naročito me interesuje usmena (narodna) književnost kao i komunikacijske vještine i retorika.**

---

Kroz sve godine koje je provela kao stipendista Irma je aktivno volontirala i doprinosila Fondaciji na razne načine. Volonterski aktivizam smatra ključnim aspektom svog djelovanja. Smatra kako joj pomaže izgraditi vjeru u sebe i svoju sposobnost da ponudi vlastite odgovore na probleme oko nas, odnosno vjeru da može promijeniti svoj i još nečiji svijet. Ipak, pored rada za korist drugih, kao volonter kaže kako je najljepša stvar što istovremeno radi na sebi, svom ličnom i profesionalnom razvoju kroz izrazito širok spektar mogućnosti koje volontiranje otvara. Volontirala je u Mostaru, ali je otvoreno prihvatala i pozive za volontiranje u drugim sredinama. Proces volontiranja shvatila je veoma prirodno i kao svojevrsnu praksu za buduću učioniku s obzirom na to da je studirala s ciljem da postane profesorica bosanskog jezika i književnosti. U skladu s tim, Irma je i nakon što je svoj studij privela kraju nastavila povremeno obavljati volonterski rad u Fondaciji kao lektor primjenjujući tako stečeno znanje u praksi, ali i, kako i sama kaže, nastojeći time zahvaliti za sve godine kroz koje je Fondacija stajala uz nju bodreći je da bez prestanka teži ka ostvarenju svojih snova bez obzira na prepreke.



# Alumni

## MJESECA

Naglašava i to da je u Fondaciji stekla i prva lektorska iskustva koja su je ohrabrila da nastavi napredovati u svojoj profesiji i da nastavi ostvarivati svoje snove, od najmanjih do najvećih.



---

Volonterizam treba da bude sastavni dio života svakog zdravog čovjeka. Različiti su načini da pomognemo zajednici, da je jačamo i kontinuirano razvijamo humanističke ideje koje počivaju u ljepoti i smislu ljudskoga postojanja. Učenici i studenti u svoje slobodno vrijeme trebaju ugraditi i vrijeme za volontiranje u segmentima gdje najviše i najbolje mogu pružiti. To su najproduktivnije godine bez obzira na sve izazove, nesigurnosti i otežane okolnosti. Za dobro i predan rad nikad nije kasno i uvijek je pravo vrijeme. Hvala plemenitim ljudima Fondacije Hastor što su me naučili vrijednosti volontiranja i pomaganja ljudima oko sebe. Ostalim stipendistima želim sreću na polju njihovog obrazovanja i na stazama životnih izazova.

---

Na kraju možemo kazati da smo sretni što je pod okriljem Fondacije Hastor izrasla jedna sposobna i samouvjerena profesorica spremna da sve svoje znanje sa zadovoljstvom prenese na druge i spremna da pomogne svima kojima njena pomoć bude potrebna. Na Irminom, ali i na primjeru brojnih drugih uspješnih bivših i sadašnjih stipendista po ko zna koji put vidimo da je misija Fondacije Hastor moguća i da se iz godine u godinu sve uspješnije ostvaruje.

# ZANIMLJIVOSTI

## Povezanost čula sluha, mirisa i okusa - čudesni napitak kafa i njena veza sa muzikom

Kafa je jedno od najpopularnijih pića na svijetu. Iako je mnogi ne piju, poziv na druženje često se upućuje pitanjem: „**Hoćemo li na kafu?**“ Njena dostupnost postala je velika, a priprema ovog napitka je gotovo pa umjetnost. Ljubitelji kafe otkrivaju svoj karakter kroz vrstu koju često vole piti, a umjetnici su joj posvetili ljubav kroz lični umjetnički izraz. Ovaj crni čudotvorni napitak povezuje ljude, ali i čovjeka sa samim sobom na početku ili tokom dana. Bilo da je čista crna ili pomiješana s drugim dodacima i aromama, kafa je stvorila lični ritual uživanja za svakog ljubitelja ovog napitka.



Uprkos tome što na prvi pogled zvuči čudno pa gotovo i nemoguće, kafa je svoju poveznicu našla i s muzikom. Čudesna veza kafe i muzike ostvaruje se kroz kompozicije koje su joj posvetili neki od najznačajnijih kompozitora kroz historiju, ali i kroz lični pristup tokom konzumiranja. Najljepši doživljaj slojevitog okusa kafe je u kombinaciji s prijatnom muzikom. Tada možete biti i sami, a ipak se ne osjećati usamljeno jer vas okružuju dvije ljubavi: kafa i muzika.

# ZANIMLJIVOSTI

## Povezanost čula sluha, mirisa i okusa - čudesni napitak kafa i njena veza sa muzikom

Među najpoznatijim kompozicijama posvećenim ovom napitku je Kantata o kafi. Djelo je komponovao Johann Sebastian Bach 1734. godine, a prikazuje scene iz svakodnevnog građanskog života, komično opisuje ženinu ovisnost o kafi i to tako da je glavni lik kantate ljut na svoju kćerku što prekomjerno konzumira kafu, čak tri šoljice dnevno. Sam Bach je bio ovisnik o kafi i navodno je pio 30 šoljica dnevno.



Wolfgang Amadeus Mozart je također bio ljubitelj kafe. Omiljena kafa mu je bila crna, a svoju ljubav prema njoj prožeo je i kroz jedan dio opere Don Giovanni.

Ludwig van Beethoven bi započeo svoj dan ispijanjem kafe napravljene od tačno 60 zrna. Čvrsto je vjerovao je daje za savršenu šoljicu kafe potreban tačno toliki broj zrna. Glen Gould, jedan od najpoznatijih pijanista 20. stoljeća, navodno je pio galon kafe. To bi moglo biti povezano s njegovim načinom života, noću je mnogo radio i ostavljao većinu posla do posljednjeg trenutka.

I dok je kafa s jedne strane inspiracija u (muzičkom) životu kompozitora, s druge strane je inspiracija i za stvaranje posebnog žanra posvećenog samo njoj. Stvaranje muzičke atmosfere u kafiću danas dobija veliki značaj. Neki kafići posebno vode računa o muzičkom žanru koji će ispuniti prostor. Takvi žanrovi se najčešće opisuju kao bossa nova, soft rock ili jazz (džez).

Na kraju se da zaključiti da je jazz „najkofeiniranija“ vrsta muzike uz koju se otvaraju apetiti i čula postaju intenzivnija.



# OBJEKTIV

## Volonterske aktivnosti stipendista



**Said Kamenica**, volontirao je u sklopu projekta „Socijalna mapa Starog Grada“ u Sarajevu



**Melisa Merajić**, volontirala je u sklopu projekta „Korišteno jestivo ulje - energetski resursi“ u Tuzli



**Emina Nukić**, volontirala je u Gradskoj biblioteci u Živinicama



**Ajdin Čeliković**, pokosio je travu u dvorištu Studentskog doma u Tuzli



**Amina Madžak, Lamija Džaferović i Ajdin Karić**, učestvovali su u organizaciji događaja „Demo-Day“ u Sarajevu

# Rad MJESECA



# Poetski KUTAK

## *Uglovi bića mog*

U uglovima bića moga

Krhka se mečava rađa

Kivna i plaha, da probudi

Mila sanjanja predgrađa

Slatko bdijenje draži mi kosti

Ništa jače od ptičjeg leta

Tjera i goni prašinu svu

Što krila je zrake tisuć' ljeta

Dah magli zoru i usnuli grad

Topi se čelik podno ruže

Malaksala je sudbina naša

Životi nam samo do smrti služe

Cvijeće bajno livade grli

Od straha bliske jesenje smrti

Što li decembar samo dočeka

Usamljen, grub, četinar ljuti?

Pokradow rosu za ljubav ovu

Da njom isperem srce tvoje

Od krila majčinog pa sve do kraja

Kratak je put za ljubav u dvoje



**Autorica:** Jasmina Ejubović



**FONDACIJA**  
H A S T O R



### Kontaktirajte nas!

Bulevar Meše Selimovića 16,  
Sarajevo  
033 774 789  
033 774 823  
[fondacija@hastor.ba](mailto:fondacija@hastor.ba)



### Redakcija

Džana Vrabc  
Emra Kulo  
Fatima Gazić  
Aleksandra Đukić  
Aleks Isaković  
Nedžma Latić  
Almina Šabanović  
Amina Abaspahić



### Grafički dizajn

Belma Kapić  
Edna Porča



### Naslovница

Belma Kapić  
"Plavo vozilo", tempera